



## Adroddiad Arolygu

Cylch Meithrin Glan y Fferi

Ysgol Glan Y Fferi  
Heol Caerfyrddin  
Glan Y Fferi  
Sir Gaerfyrddin  
SA17 5TB

This report is also available in English

Mae'r adroddiad hwn hefyd ar gael yn Saesneg



**Dyddiad Cwblhau'r Arolygiad**

28/02/2023

**Llywodraeth Cymru © Hawlfraint y Goron 2023.**

Cewch ddefnyddio ac aildefnyddio'r wybodaeth sydd yn y cyhoeddiad hwn (ac eithrio'r logos) yn ddi-dâl, mewn unrhyw fformat neu gyfrwng, o dan delerau'r Drwydded Llywodraeth Agored. Gallwch weld y Drwydded Llywodraeth Agored ar wefan yr Archifau Gwladol, neu gallwch ysgrifennu at The Information Policy Team, The National Archives, Kew, London, TW9 4DU, neu anfon e-bost i: [psi@nationalarchives.gsi.gov.uk](mailto:psi@nationalarchives.gsi.gov.uk)

Rhaid i chi atgynhychu ein deunydd yn fanwl gywir a pheidio â'i ddefnyddio mewn cyd-destun camarweiniol.

## Cylch Meithrin Glan y Fferi

Y math o ofal a ddarperir	Gofal Dydd Plant Gofal Dydd Llawn
Darparwr Cofrestredig	Cylch Meithrin a Ti a Fi Glan Y Fferi
Lleoedd cofrestredig	19
Iaith y gwasanaeth	Cymraeg
Arolygiad blaenorol Arolygiaeth Gofal Cymru	Hwn oedd arolygiad cyntaf y gwasanaeth ers ei gofrestru yn Hydref 2020.
A yw hwn yn wasanaeth Dechrau'n Deg?	Nac ydy
A yw'r gwasanaeth hwn yn darparu'r Cynnig Rhagweithiol ar gyfer y Gymraeg?	Mae'r gwasanaeth yn darparu 'Cynnig Rhagweithiol' ar gyfer y Gymraeg. Mae'n darparu gwasanaeth sy'n rhagweld, yn nodi ac yn diwallu anghenion Cymraeg a diwylliannol pobl sy'n defnyddio'r gwasanaeth, neu a all ei ddefnyddio.

<a href="#"><u>Llesiant</u></a>	Da
<a href="#"><u>Gofal a Datblygiad</u></a>	Da
<a href="#"><u>Yr Amgylchedd</u></a>	Da
<a href="#"><u>Arweinyddiaeth a Rheolaeth</u></a>	Da

I gael rhagor o wybodaeth am raddau, gweler diwedd yr adroddiad hwn

## Crynodeb

Mae'r plant yn hapus ac yn gallu ymlacio ac mae ganddynt gydberthnasau da â'r staff ac â'i gilydd. Maent yn cael cyfleoedd i wneud penderfyniadau drostynt eu hunain ac mae eu hanghenion yn cael eu diwallu a'u dewisiadau yn cael eu bodloni. Mae'r rhyngweithio rhwng y plant a'r staff yn dda. Mae'r plant yn mwynhau eu chwarae ac yn canolbwyntio ar y gweithgareddau a ddewiswyd ganddynt, gan ddatblygu amrywiaeth o sgiliau annibyniaeth.

Mae'r staff yn deall eu rolau a'u cyfrifoldebau o ran cadw'r plant yn ddiogel ac yn iach. Maent yn defnyddio strategaethau rheoli ymddygiad da a chadarnhaol. Mae'r staff yn annog datblygiad y plant drwy chwarae.

Mae'r bobl sy'n rhedeg y lleoliad yn sicrhau bod yr amgylchedd yn ddiogel ac mewn cyflwr da. Mae'r ardal chwarae dan do wedi'i threfnu'n dda, ac mae'r ardal awyr agored wedi'i datblygu'n dda. Mae ystod dda o adnoddau hygrych sy'n addas ar gyfer oedrannau a chamau datblygiad y plant.

Mae'r bobl sy'n rhedeg y lleoliad yn drefnus. Maent yn dilyn prosesau recriwtio da ac yn cynnal gwiriadau addasrwydd ac yn trefnu'r staff yn effeithiol. Mae'r bobl sy'n rhedeg y lleoliad yn adolygu ansawdd gofal y gwasanaeth. Mae'r partneriaethau â'r rhieni'n dda iawn.

Mae'r plant yn hapus ac yn gallu ymlacio ac mae ganddynt gydberthnasau da â'r staff ac â'i gilydd. Mae'r plant yn ddigon hyderus i fynd at y staff am gymorth. Aethant at y staff pan oeddent eisiau chwarae gyda'r toes chwarae ac eisiau cael cymorth i wisgo eu hesgidiau glaw er mwyn chwarae yn yr awyr agored. Mae'r plant yn cael cyfleoedd i wneud penderfyniadau drostynt eu hunain. Er enghraifft, maent yn dewis pa fannau y maent am chwarae ynddynt a chael mynediad iddynt dan do ac yn yr awyr agored. Caiff eu hanghenion a'u dewisiadau eu hystyried. Er enghraifft, yn ystod amser cylch, roedd y plant nad oeddent yn barod i ymateb i'r pyped yn cael eu parchu. Mae'r plant yn teimlo ymdeimlad o gyflawniad. Gwnaethant wenu wrth iddynt gael eu canmol am ymateb i gwestiynau yn ystod amser cylch.

Mae gan y plant ymdeimlad da o berthyn. Maent yn teimlo'n hyderus yn eu hamgylchedd ac yn setlo'n dda i chwarae ymhlith eu ffrindiau. Mae'r plant yn gyfarwydd â'u harferion. Er enghraifft, tacluso'r adnoddau yn llwyddiannus. Maent yn deall yr angen i olchi eu dwylo cyn bwyta.

Mae'r rhyngweithio rhwng y plant yn dda. Maent yn dangos parch a gofal tuag at eraill. Er enghraifft, wrth gymryd eu tro i chwarae gyda'r dŵr yn yr awyr agored, '*Look more water coming*'. Dengys y plant garedigrwydd i'w gilydd gan rannu adnoddau drwy enwi lluniau o anifeiliaid ar gardiau wrth chwarae â thoes chwarae. Sicrhaodd un plentyn fod gan blentyn arall fynediad at ei hoff degan, trwy roi cerbyd plastig iddo.

Mae'r plant yn mwynhau eu chwarae. Roeddent yn canolbwyntio ar y gweithgareddau a gynigir iddynt. Dewisodd y plant rollo a thorri'r toes chwarae gyda chefnogaeth y staff a defnyddio torwyr i wneud siapiau gwahanol. Mae'r plant yn canolbwyntio ar dasgau ac ar yr ardaloedd chwarae a ddewisir ganddynt. Roeddent yn mwynhau eu gweithgareddau, ac roedd hyn yn amlwg wrth iddynt chwarae yn yr awyr agored. Ychwanegodd y plant ddŵr at yr olwyn ddŵr, gan wneud iddi droelli. Roedd eraill yn dangos mwynhad wrth weithio gyda'i gilydd yn arllwys dŵr i lawr y pibellau dŵr plastig. Mae'r plant yn datblygu patrymau'r Gymraeg drwy ganu a thrafod. Maent yn mwynhau amser cylch, gan ganu hwiangerddi Cymraeg megis 'Bore da', 'Pump crocodeil' a 'Mr Hapus ydw i.'

Mae'r plant yn datblygu rhai cyfleoedd i ddod yn annibynnol. Maent yn cyrchu'r sinc yn annibynnol trwy ddefnyddio gris, yn defnyddio'r peiriant sebon hylif heb gefnogaeth, cyn symud ymlaen i olchi dwylo. Maent yn datblygu ystod o sgiliau ac yn dangos sgiliau echddygol manwl da drwy ddefnyddio offer ar gyfer gweithgareddau. Mae'r plant yn gallu datblygu eu hannibyniaeth yn ystod amser byrbryd. Dywedodd y staff wrthym eu bod yn rhoi menyn ar dost eu hunain gan ddefnyddio cyllell. Yn ystod yr ymweliad cafodd y plant gynnig craceri ac afal. Mae'r plant yn dangos ymwybyddiaeth o enwau lliwiau, cyfrif, enwau anifeiliaid a rhifau yn Gymraeg.

Mae'r staff yn deall eu rolau a'u cyfrifoldebau o ran cadw'r plant yn ddiogel ac yn iach. Maent yn rhoi arferion glanhau a hylendid priodol ar waith. Mae'r staff yn sicrhau bod pob plentyn yn golchi ei ddwylo cyn bwyta a bod y byrddau'n cael eu diheintio cyn i'r plant fwyta eu bwyd. Mae'r staff yn paratoi dewisiadau iachus i'r plant yn ystod amseroedd byrbryd, sy'n cynnwys ffrwythau, tost, craceri a dewis o ddŵr neu laeth. Mae'r plant yn dod â'u pecynnau cinio a'u diodydd eu hunain. Mae'r staff yn sicrhau bod y bwyd yn y pecynnau bwyd yn cael ei storio'n briodol.

Dangosodd trafodaethau â'r staff eu bod yn deall yr angen am arferion diogelu da. Maent yn deall y gweithdrefnau a'u rolau a'u cyfrifoldebau pe bai pryder amddiffyn plant neu ddiogelu. Caiff cofnodion meddyginiaeth, digwyddiadau a damweiniau eu cadw a chânt eu llofnodi gan y staff a'r rhieni. Fodd bynnag, nid yw'r rhieni/gofalwyr wedi llofnodi ar gyfer anafiadau presennol ar hyn o bryd. Mae pob aelod o'r staff wedi cwblhau hyfforddiant cymorth cyntaf pediatrig a hyfforddiant diogelu ac amddiffyn plant ac wedi cwblhau hyfforddiant hylendid bwyd. Mae gan y staff ymwybyddiaeth dda o alergeddau ac anoddefiadau'r plant, ac mae asesiadau risg a chynlluniau gweithredu ar waith ar gyfer unrhyw argyfyngau a allai godi. Mae'r staff yn gwisgo cyfarpar diogelu personol priodol wrth newid cewynnau, ac maent yn diheintio'r ardaloedd newid ar ôl newid pob cewyn.

Mae'r staff yn deall y polisi ymddygiad ac yn rhoi strategaethau rheoli ymddygiad da ar waith yn ôl yr angen. Os bydd sefyllfa yn codi lle bydd y plant am gael yr un adnoddau, byddant yn mynd ati'n ddigynnwrf i drafod y mater â'r plant. Er enghraifft, roedd y plant yn cael eu hannog i rannu a chymryd eu tro wrth ddewis cardiau anifeiliaid. Mae'r staff yn annog y plant mewn ffordd gadarnhaol. Maent yn canmol y plant am orffen eu byrbrydau ac am dacluso'n dda. Mae'r staff yn dangos esiampl dda. Maent yn annog y plant i ddweud '*Diolch*' a'u canmol am helpu, "*da iawn am helpu.*"

Mae'r staff yn annog dysgu drwy chwarae. Maent yn annog y plant i gyfrif y peli pom pom lliw wrth gymryd rhan mewn gweithgaredd mathemategol. Mae'r staff yn cael trafodaethau gyda'r plant am y lliwiau, maint a maint y gallant eu gweld yn ystod y gweithgaredd ac yn annog y plant i drafod enwau anifeiliaid yn ystod amser cylch. Mae'r staff yn cynllunio eu gweithgareddau a'u darpariaeth chwarae yn briodol gan sicrhau bod gan y plant adnoddau sy'n gysylltiedig â'r themâu a diddordebau'r plant. Fodd bynnag, nid yw'r cynllunio yn benodol i sgil. Mae ganddynt ddealltwriaeth dda o'r Cwricwlwm newydd i Gymru ac maent yn datblygu ffyrdd effeithiol o gynllunio ac asesu. Mae'r staff yn hyrwyddo gwybodaeth am wahanol ddiwylliannau ac amrywiaeth, a dealltwriaeth ohonynt, drwy ddatlu gwyliau fel y Flwyddyn Newydd Tsieineaidd.

Mae'r staff yn hyrwyddo'r dimensiwn Cymreig drwy ddathlu diwrnod Santes Dwynwen a Dydd Gŵyl Dewi. Mae'r staff yn asesu cynnydd y plant drwy asesuadau ac arsylwadau ac yn eu defnyddio i gynllunio ar gyfer camau nesaf y plant. Gwelsom enghreifftiau o waith y plant, ond nid oedd dyddiad ar bob sampl. Mae gan y staff ddealltwriaeth dda o anghenion dysgu ychwanegol. Maent yn nodi dewisiadau, anghenion a thargedau'r plant o ran eu datblygiad unigol.

Mae'r bobl sy'n rhedeg y lleoliad yn sicrhau bod yr amgylchedd yn ddiogel ac mewn cyflwr da. Er enghraifft, mae'r fynedfa yn cael ei chloi, ac maent yn cadw cofnodion o ymwelwyr. Mae'r lleoliad wedi'i leoli mewn caban porta. Mae'r bobl sy'n rhedeg y lleoliad yn cynnal asesiadau risg cadarn, ac yn rhoi arferion glanhau ar waith. Mae'r gwiriadau cynnal a chadw a'r gwiriadau tân yn gyfredol. Caiff ymarferion tân rheolaidd eu cofnodi.

Mae'r ardal chwarae dan do yn fawr ac wedi'i threfnu'n effeithiol. Mae'r amgylchedd yn creu ymdeimlad o berthyn gyda phegiau enwau unigol i'r plant ac arddangosfeydd o gyflawniadau'r plant gan gynnwys eu gwaith celf. Mae ardal ddynodedig ar gyfer plant iau yn ogystal â man tawel ar gyfer y rhai sydd angen gorffwys.

Mae'r adnoddau o fewn cyrraedd y plant, ac mae dewis o deganau ac adnoddau ar gael i wella eu cyfleoedd chwarae a dysgu. Mae'r bobl sy'n rhedeg y lleoliad yn darparu adnoddau i ddatblygu creadigrwydd, iaith, datblygiad mathemategol, sgiliau chwarae dychmygus a chwilfrydedd y plant. Mae'r ardal awyr agored wedi'i hamgáu ac mae'n cynnig man dysgu effeithiol i'r plant, sy'n cynnwys cyfleoedd i chwarae gyda dŵr, gwneud marciau, cegin fwd ar gyfer gweithgareddau chwarae dychmygus ac adnoddau sy'n hybu datblygiad corfforol. Yn ystod yr ymweliad arolygu, dywedodd y staff wrthym fod hambyrddau gweithgareddau awyr agored yn cael eu gwirio a'u gwagio'n rheolaidd, er enghraifft yr hambwrdd dŵr. Mae adnoddau sy'n hyrwyddo diwylliannau ac amrywiaeth, sy'n cynnwys doliau, cymeriadau a llyfrau.



Mae'r bobl sy'n rhedeg y lleoliad hwn yn drefnus ac mae ganddynt weledigaeth glir ar gyfer dyfodol y lleoliad. Maent yn adolygu polisïau a gweithdrefnau ac yn eu gweithredu'n effeithiol yn ymarferol. Diweddarwyd y datganiad o ddiben yn ystod y broses arolygu ac mae'n cydymffurfio'n llawn â'r rheoliadau ac yn bodloni safonau gofynnol cenedlaethol. Mae'r cymarebau rhwng y staff a'r plant yn gywir er mwyn diwallu anghenion y plant. Mae cofnodion o'r plant a'r staff sy'n bresennol bob dydd. Mae yswiriant Atebolrwydd Cyhoeddus wedi'i drefnu.

Mae'r bobl sy'n rhedeg y lleoliad yn trefnu'r staff yn effeithiol er mwyn sicrhau eu bod yn ymwybodol o'u rolau a'u cyfrifoldebau. Cynhelir cyfarfodydd staff yn rheolaidd er mwyn trafod newidiadau, digwyddiadau a diweddariadau i'r polisïau a'r gweithdrefnau. Mae gan y bobl sy'n rhedeg y lleoliad hwn ddealltwriaeth dda o'u cyfrifoldebau i amddiffyn y plant.

Mae'r bobl sy'n rhedeg y lleoliad wedi adolygu ansawdd y gofal a ddarperir. Maent yn ceisio adborth gan rieni trwy holiaduron tymhorol yn ogystal ag adborth gan y plant a'r staff. Mae'r bobl sy'n rhedeg y lleoliad yn darparu 'Cynnig Rhagweithiol' ar gyfer y Gymraeg.

Mae'r bobl sy'n rhedeg y lleoliad yn dilyn prosesau recriwtio da ac yn sicrhau bod gwiriadau addasrwydd, gan gynnwys gwiriadau'r Gwasanaeth Datgelu a Gwahardd, wedi cael eu cynnal ar gyfer pob aelod o'r staff. Mae'r bobl sy'n rhedeg y lleoliad yn sicrhau bod pob aelod o'r staff yn derbyn sesiynau sefydlu amserol. Caiff gwerthusiadau eu cofnodi'n ffurfiol ac maent yn amlygu meysydd ar gyfer datblygiad proffesiynol a hyfforddiant. Fodd bynnag, mae goruchwyliadau yn cael eu cynnal yn anffurfiol gan aelodau o'r staff. Dywedodd y staff wrthym eu bod yn teimlo'n hapus iawn ac yn cael eu cefnogi'n dda yn eu rolau ac mae polisi drws agored, cyfarfodydd wythnosol a grŵp WhatsApp ar gyfer trafodaethau. Mae cymwysterau'r staff yn bodloni'r gofynion, ac mae gofynion hyfforddiant gorfodol yn cael eu bodloni. Mae'r bobl sy'n rhedeg y lleoliad yn gwneud ymdrech ymwybodol i hysbysu Arolygiaeth Gofal Cymru am newidiadau i'r lleoliad.

Mae'r partneriaethau â'r rhieni'n dda iawn. Roedd y rhieni y siaradwyd â nhw yn ystod yr arolygiad yn canmol y lleoliad, "*Communication is effective here. We get daily as well as weekly updates*", "*My child can't wait to come. He settled well and quickly.*" Mae'r rhieni yn teimlo eu bod yn cael y wybodaeth ddiweddaraf a bod y staff gofal yn hawdd iawn mynd atynt ac yn diwallu anghenion personol y plant. Mae gan y lleoliad dudalen cyfryngau cymdeithasol preifat lle caiff gwybodaeth ei rhannu am weithgareddau diweddar. Rhennir gwybodaeth bellach gyda rhieni trwy ap, ar lafar a thrwy gylchlythyr tymhorol.

## **Argymhellion i gyrraedd y Safonau Gofynnol Cenedlaethol**

A1: Sicrhau bod cofnod ffurfiol yn cael ei gadw o oruchwyliaeth staff.

A2: Sicrhau bod rhiant/gofalwr yn arwyddo ar gyfer anafiadau presennol.

A3: Sicrhau bod gan adnoddau awyr agored gaeadau/gorchuddion.

A4: Sicrhau bod cynllunio gweithgareddau yn cynnwys datblygu sgiliau.

A5: Sicrhau bod dyddiad ar waith y plant i olrhain dilyniant ac atchweliad.

A6: Hyrwyddwch adnabyddiaeth enwau ymhellach trwy ychwanegu llun y plant at begiau enwau.

<b>Crynodeb o'r Achos o Ddiffyg Cydymffurfio</b>	
<b>Statws</b>	<b>Ystyr pob un</b>
<b>Newydd</b>	Nodwyd yr achos hwn o ddiffyg cydymffurfio yn yr arolygiad hwn.
<b>Adolygwyd</b>	Adolygwyd cydymffurfiaeth yn ystod yr arolygiad hwn ond ni lwyddwyd i'w chyflawni. Mae'r dyddiad targed ar gyfer cydymffurfio yn y dyfodol a chaiff ei brofi yn ystod yr arolygiad nesaf.
<b>Heb Gyflawni</b>	Profwyd cydymffurfiaeth yn ystod yr arolygiad hwn ond ni lwyddwyd i'w chyflawni.
<b>Cyflawnwyd</b>	Profwyd cydymffurfiaeth yn ystod yr arolygiad hwn a llwyddwyd i'w chyflawni.

Rydym yn ymateb i achosion o ddiffyg cydymffurfio â rheoliadau pan gaiff canlyniadau gwael i bobl, a/neu risg i lesiant pobl eu nodi drwy gyhoeddi Hysbysiad(au) Gweithredu â Blaenoriaeth.

Rhaid i'r darparwr gymryd camau ar unwaith i ymdrin â hyn a gwneud gwelliannau. Os bydd darparwyr yn methu â chymryd camau gweithredu â blaenoriaeth erbyn y dyddiad targed, gallwn uwchgyfeirio'r mater at Banel Gwella a Gorfodi.

<b>Hysbysiad(au) Gweithredu â Blaenoriaeth</b>		
<b>Rheoliad</b>	<b>Crynodeb</b>	<b>Statws</b>
Dd/G	Ni nodwyd unrhyw achosion o ddiffyg cydymffurfio o'r math hwn yn yr arolygiad hwn	Dd/G

Lle byddwn yn canfod achosion o ddiffyg cydymffurfio â rheoliadau ond na chaiff unrhyw risg uniongyrchol na sylweddol i'r bobl sy'n defnyddio'r gwasanaeth ei nodi, byddwn yn tynnu sylw atynt fel Meysydd i'w Gwella.

Byddwn yn disgwyl i'r darparwr gymryd camau i unioni'r achos a byddwn yn ei ystyried eto yn yr arolygiad nesaf. Lle bydd y darparwr wedi methu â gwneud y gwelliannau angenrheidiol, byddwn yn uwchgyfeirio'r mater drwy gyhoeddi Hysbysiad Gweithredu â Blaenoriaeth.

## Maes i'w Wella/Meysydd i'w Gwella

Rheoliad	Crynodeb	Statws
Dd/G	Ni nodwyd unrhyw achosion o ddiffyg cydymffurfio o'r math hwn yn yr arolygiad hwn	Dd/G

Graddau	Ystyr y graddau
<b>Rhagorol</b>	Gwasanaethau sy'n ymrwymedig i welliant parhaus ac sydd â llawer o gryfderau, gan gynnwys enghreifftiau arwyddocaol o ymarfer ac arloesi sy'n arwain y sector. Mae'r gwasanaethau hyn yn darparu gofal a chymorth o ansawdd uchel a gallant ddangos eu bod yn gwneud cyfraniad cadarn tuag at wella llesiant plant.
<b>Da</b>	Gwasanaethau sydd â chryfderau a heb unrhyw feysydd pwysig sydd angen eu gwella'n sylweddol. Maent yn rhagori ar y gofynion sylfaenol yn gyson, gan sicrhau canlyniadau cadarnhaol i blant a hybu eu llesiant yn rhagweithiol.
<b>Digonol</b>	Gwasanaethau lle mae mwy o gryfderau na meysydd i'w gwella. Maent yn ddiogel ac yn bodloni'r gofynion sylfaenol ond mae angen gwelliannau er mwyn hyrwyddo llesiant a gwella canlyniadau i blant.
<b>Gwael</b>	Gwasanaethau lle mae mwy o feysydd pwysig i'w gwella na chryfderau ac mae enghreifftiau arwyddocaol o ddiffyg cydymffurfio sy'n effeithio'n negyddol ar lesiant plant. Lle bydd gwasanaethau yn wael, byddwn yn cymryd camau gorfodi ac yn cyhoeddi hysbysiad diffyg cydymffurfio.

Dyddiad Cyhoeddi 04/05/2023